

## DEMANTI

# KM Trade se oglasio o poslu koji je sklopio s FUCZ-om: Ne postoji nikakva tajna veza

R. D.  
8.5.2020. u 15:01

64 komentara  
36 dijeljenja



KM Trade

Kadrinja Kolić



**Na tekst koji je na portalu Klix.ba objavljen pod naslovom "Fahrudin Solak u martu dodijelio posao od skoro 600 hiljada KM firmi svog advokata" reagovali su iz kompanije KM Trade.**

Reagovanje prenosimo u cijelosti:

Dana 8. maja 2020. godine objavili ste tendenciozan tekst sa zlonamjernim nadnaslovom "Ima neka tajna veza" i naslovom "Fahrudin Solak u martu dodijelio posao od skoro 600 hiljada KM firmi svog advokata".

Tražimo od vas, u skladu sa zakonskim odredbama, da na istom mjestu gdje ste plasirali ovaj tekst, objavite i naše reagiranje, u cijelosti.

Već samom naslovnom kompozicijom implicirate nešto što je pred svakim sudom na svijetu difamacija i za što se snose posljedice.

Odmah da kažemo, a to ne možete sakriti ni u svom tekstu, ne postoji nikakva "tajna veza".

Drugo, dovođenje posla koji je realiziran u martu mjesecu, a urađen na osnovu objavljenog tendera iz 2019. godine, sa sadašnjim angažmanom Kadrije Kolića, koji je jedan od dvojice vlasnika KM Tradea, implicirate povezanost svega s pandemijom koronavirusa, što je notorna besmislica.

Firma KM Trade postoji već 21 godinu i najuspješnija je u Bosni i Hercegovini u svojoj branši. Naša grupacija zapošljava ukupno oko 350 radnika. Svoje obaveze prema uposlenicima i državi izvršavamo uredno i na vrijeme. Redovna inspekcija državnih organa potvrđuje i to, kao i besprijeekornost poslovanja.

Vi, u neutaživom senzacionalizmu, nastojite sve to potrijeti.

Konkretan posao o kojem donosite tekst, kako smo naveli, urađen je na osnovu javnog tendera, objavljenog u skladu sa Zakonom o javnim nabavkama na koji smo se javili. Ispunili smo tražene uvjete i posao zaključen i uredno izvršen.

Vi navodite i iznos od 633.500 KM za posao iz 2014. godine.

Iz vama znanih razloga probrali ste samo nabavke od 2014. naovamo koje je realizirala Federalna uprava civilne zaštite i to samo s našom firmom.

Godišnji budžet Federalne uprave civilne zaštite je najmanje 20 miliona maraka. Da niste podlegli tendencioznosti, mogli ste imati jasniju sliku i ispravno viđenje. Umjesto toga, odlučili ste se na "žutilo".

Mi poštujemo vaš izbor, a za ostalo ćemo komunicirati preko suda.

---